
Фарғона вилояти ҳокими Шухрат Ғаниев Лолахон Муротовани Ўзбекистон Қаҳрамони бўлгани билан табриклади

Ўзбекистон Қаҳрамони Лола Муротова: Оддий бир қишлоқ аёлига кўрсатилган юксак эътибордан бошим осмонга етди

Президентимизнинг фармони билан Олтиариқ туманидаги “Нурли обод” фермер хўжалиги бошлиғи Лола Муротованинг “Ўзбекистон Қаҳрамони” унвони билан тақдирлангани ҳақидаги хушхабар бутун фарғоналикларни қувонтириб юборди. Қаҳрамон опанинг дала шийпонига Фарғона вилояти ҳокими Ш. Ғаниев ва вилоят жамоатчилиги вакиллари ташриф буюриб, давлатимизнинг юксак унвони билан табриклади.

Ҳаёти, умрининг мазмунини деҳқончилик ривож-равнақида кўрадиган Лолахон опа истиқлол йилларида фермерликдан чинакам бахт топди. Опа ҳаёт дорилфунунини адо этди. Тракторчи, оддий ишчи, механик, табелчи, бригадир, бўлим бошлиғи, хўжалик раиси бўлди. Марказий Фарғонанинг чўл-дашт ерларида пахта, бошоқли дон етиштиришда катта муваффақиятларга эришиб, фермерлик соҳасида ўзига хос тажриба ва маҳорат мактаби яратди. Ҳукуматнинг қўша-қўша орденларига, “Ўзбекистонда хизмат кўрсатган қишлоқ хўжалик ходими” деган фахрий унвонга сазовор бўлди.

Лолахон Муротова ҳеч бир муболағасиз, деҳқончилик илми профессори, академигидир. Шу боис ҳар бир нафаси, қараши, ҳатти-ҳаракатида ғайрат-шижоати барқ уриб турадиган фидойи замондошимизнинг қадди-камалига боқиб, Ўзбекистоннинг ғурур ва ифтихорининг жонли тимсолини кўргандек бўламиз. Фермерликдан эл аро ҳурмат топган бу самимий, тантилик барқ урган чехрадаги чизикларда илк бор чигит унган кунлар, пахта гули очилган тонглар, пахтазорлар кўркининг ажиб намуналари акс этгандек гўё.

– Оддий бир қишлоқ аёлига Президентимизнинг кўрсатган юксак эътиборидан бошим осмонга етди, – дейди Ўзбекистон Қаҳрамони Л. Муротова. – Ҳеч қачон бу ҳақда ўйламагандим. Вилоят ҳокимимизнинг ўзлари биринчилардан бўлиб табриклаб, шундай деганларида рост жуда ҳам ҳаяжонландим. Бундай эъзоз ва эътибор учун давлатимиз раҳбаридан миннатдорман.

“Тинчлик” маҳалла фуқаролар йиғинидаги маданият уйида давом этган қаҳрамон опани қутлаш тадбири катта шодиёнага айланди.

М. Сулаймонов, ЎЗА

2019-08-29 12:05:07